

cæteraque vitæ usui necessaria sufficiat, quam victus inopiam ut utcumque sublevent, subinde cervorum, quorum ibi non exiguus numerus, venationi indulgent. nullum agnoscunt regem, aut gentis suæ caput, sui quisque juris ac liber degit, neque ita cum sociis suis ac vicinis conveniunt aut pacem obtinent, sæpe pagus in pagum alterum arma movet, ac bella gerunt cum vicinis. Comes aliquo modo sunt & urbani in agendo cum hominibus, ab exteris minime abhorrent, nisi ab iis injuria affecti sint: arcu & sagittis armati facile adversarii incursum aut impetum prohibent, aut repellunt. Tentatum sæpe fuit à viris religiosi, natione Hispanis, modusne esset facilis eos ad fidem Christianam convertendi, at ob gentis nimiam adhuc feritatem & barbariem, ut illi ajunt, parum admodum effectum est: & si qui ibi fidem nostram admiserint, ex iis maxime fuere, qui ex Sinarum continenti illuc ad sua peragenda mercimonia advolarant: cum quidpiam novi vident, aut quod illis arrideat, id summo cum judicii neglectu seposito omni pudore petunt, ut pueri solent, & vel minima re concessa quam mox acquiescunt: nudi omnes incedunt æstivo tempore, hyeme male tecti sunt. Mulieres statura parvæ sunt, insita quadam naturæ verrecundia virorum adspectum ac familiaritatem fugiunt: plerique ex hac gente in altissimis montibus habitant, neminemque ad se accedere sinunt, ipsimet ad sua obeunda negotia descendunt.

Abundat hæc insula cervis, apris, leporibus, phasianis, columbis, vaccis, similibusque animalibus tam cicuribus, quam feris: vaccarum caro præ reliquis ibi suavissima esse dicitur, aprugna rarior ac inter delicias numeratur: ibidem magna gingiberis copia

est, aquilæ lignum odoriferum, nuces Indicæ palmarum, musæ aliique hujuscemodi fructus. gleba ubique pinguis est, & si coleretur more Sinico, magnam promittit ubertatem ac luxuriam frugum. spatiosis sponte sua natis annosisque arboribus umbram facit ex apricis campis recedentibus, qui lato alias gramine virefcere solent. Aurum ibi in montibus reperiri vix ullus est qui dubitet ex iis, ad quos aliqua hujus Insulæ notitia pervenit, sed ingredi eos hætenus nemo est ausus: ex montibus flumina ac rivipromanant, qui totam insulam irriguam ac fertilem reddunt. Incolarum merces potissimum sunt pelles cervorum, exsiccati illorum nervi, quæ Sinæ panni ac serici commutatione comparant: sicci enim cervorum nervi maxime à Sinis ad lautitias ciborum, mensæque apparatus expetuntur, aqua enim hi macerati, coctique plane suavissimi sunt, creduntque Sinæ victum hunc non nihil ad vitam diutius producendam conferre, opinione forte hac à longissima, quam prædicant, cervorum ætate ac vita orta, unde & suos illi immortales solent fere ita depingere: sedet crassiculus quispiam ac bene curata cute, cujus pinguis aqualiculus sequipede extat, decussatis cruribus, adstat ad latus dextrum cervus longævum animal, qui herum limis oculis benigno scilicet aspectu ac influxu intuetur, à sinistro latere ciconia est, incurvum, inflexumque rostrum versus dominum suum porrigens, ipse compositis intra manicas manibus veneranda canitie, longumque protensa, pectore superiore nonnihil aperto, quo pinguiusculus magis appareat, magna vestitus majestate ac decore, quod simulachrum alicubi pro idolo colitur, ac signo felicitatis à stultis hisce gentilibus.

*Idolum
immortalitatis.*